

- gweledigaeth neu genhadaeth gyffredin a deall diwylliannau a disgwyliadau gwahanol;
- gwaith ymchwil ac archwiliadau cefndir priodol, ac ar gyfer cyfuniadau ar raddfa fawr, ymarfer datgelu neu ddiwydrwydd dyladwy llawn;
- trefniadau cyfansoddiadol priodol, e.e. pŵer i uno, a fydd yn cynnig modd i elusen weithio'n effeithlon yn y tymor hwy; a
- neilltuo lefelau priodol o gyllid ar gyfer y cyfuniad, gyda'r costau gwirioneddol a'r costau a ragwelir yn cael eu hadolygu'n gyson.

Dylai elusennau sy'n defnyddio sefydliadau cyfryngu

- fel Sefydliad Anlywodraethol sefydledig neu elusen leol, mewn trefniant cydweithio rhyngwladol, lunio cytundeb ffurfiol sy'n amlinellu'r trefniant.

Mae elusennau sy'n rhan o strwythur grŵp yn fwy tebygol o wireddu buddiannau'r strwythur grŵp:

- os oes perthynas glir a thryloyw ganddynt â'r sefydliadau eraill o fewn y grŵp;
- os ydynt yn gwario eu harian elusennol ar hybu eu hamcanion ac yn ymwybodol i ba raddau y gall elusen gefnogi sefydliad anelusennol o fewn grŵp; ac
- os oes ganddynt drefniadau rheolaeth grŵp sy'n golygu bod modd i ymddiriedolwyr pob is-gwmni gymryd penderfyniad dim ond er lles eu helusen a'i defnyddwyr neu ei buddiolwyr, ac yn unol â'r polisi gweithredol cyffredinol a bennir gan y rhiant-gwmni.

Ynglŷn â'r adroddiad

Mae'r adroddiad ar gydweithio a chyfuniadau elusennau wedi cael ei baratoi gan ddefnyddio tystiolaeth o gofnodion y Comisiwn Elusennau ac archwilio ein ffeiliau achosion. Rydym wedi siarad â nifer o elusennau hefyd, a chynnal arolwg ffurfiol.

Bydd yr adroddiad llawn **Cydweithio a chyfuniadau (RS4)** ar gael maes o law.

Dylai ymddiriedolwyr elusennau sy'n rhan o strwythur cenedlaethol gydag aelodau, fel mater o arfer dda:

- fod yn glir ynghylch nodweddion eu strwythur rheolaeth unigryw;
- ceisio cael y buddiannau mwyaf y gall aelodaeth genedlaethol eu cynnig trwy gydweithio; a
- datblygu tryloywder a chyfathrebu clir o fewn y strwythur.

Rôl y Comisiwn Elusennau

Rôl y Comisiwn Elusennau yw annog elusennau i ystyried cydweithio, hyd at a chan gynnwys cyfuniad mewn achosion priodol, lle y gallant gynyddu effeithlonrwydd a darparu gwasanaeth gwell i ddefnyddwyr neu fuddiolwyr elusen. Darparwn gymorth ymgynghorol a galluogi helaeth i elusennau sy'n ystyried cyfuno, gan gynnwys, lle y bo angen, awdurdod perthnasol i elusennau sy'n gwneud trefniadau ar gyfer cydweithio neu gyfuno.

Croesawn yr argymhellion o fewn adolygiad yr Uned Strategaeth *Gweithredu Preifat, Budd Cyhoeddus* y dylai'r Comisiwn Elusennau ddarparu cyngor penodol i hwyluso cyfuniadau, a byddwn yn ceisio ehangu ein gallu ar gyfer y gwaith hwn. Byddwn hefyd yn defnyddio canfyddiadau'r adroddiad rheoleiddiol hwn ac, wrth gynnal trafodaethau â'r sector, byddwn yn cynhyrchu cyngor penodol ar gyfuniadau elusennau.

Cred rhai pobl fod gormod o elusennau yn cystadlu am y cyllid prin sydd ar gael ac y gallai swm sylweddol o adnoddau elusennol gael eu harbed pe byddai mwy o elusennau yn cyd-grynhoi eu hadnoddau ac yn gweithio gyda'i gilydd¹.

Mae'r sector elusennol wedi tyfu mewn ffordd organig sydd heb ei gynllunio. Felly mae'n anochel y bydd nifer fawr o elusennau wedi'u crynhoi mewn rhai meysydd gweithgaredd, tra gall fod bylchau mewn meysydd eraill.

Mae'r rhan fwyaf o elusennau yn sefydliadau lleol, eithaf bach sy'n dibynnu'n gyfan gwbl ar gymorth di-dâl eu hymddiriedolwyr a gwirfoddolwyr eraill. Efallai fod eu dibenion yn debyg i sawl elusen arall ond maen nhw i gyd yn gwasanaethu cymunedau gwahanol. Mae natur yr elusennau hyn yn awgrymu bod meysydd sylweddol o orgyffwrdd, dyblygu neu le i arbed costau yn llai tebygol, er y gall cydweithio, mewn rhai amgylchiadau, barhau i gynnig manteision i'r elusennau hyn.

Yr elusennau mwy o faint, sy'n gweithredu'n broffesiynol yw'r elusennau sydd, oherwydd eu maint, yn tueddu i wynebu honiadau o ddyblygu, gwastraff a dulliau codi arian rhy ymosodol. Er bod rhai manteision clir i gael lluosogrwydd iach o elusennau, sy'n cael eu hadfywio'n gyson gan elusennau newydd sy'n dilyn gweithgareddau newydd, mae manteision mawr hefyd o ran ffydd a chymorth y cyhoedd yn deillio o'r gallu i ddangos greddfau cydweithredol, o'i gyferbynnu â greddfau gor-gystadleuol.

Mae amrywiaeth ac annibyniaeth yn gryfderau pwysig. Ond i nifer o elusennau gall cydweithio neu gyfuno olygu'r defnydd mwy effeithiol o adnoddau i ateb anghenion defnyddwyr, a dylai cynyddu gweithgaredd o'r fath hybu ffydd y cyhoedd mewn elusennau. Nid rôl y Comisiwn Elusennau yw gwthio elusennau arbennig - mae'n rhaid iddynt hwy eu hunain benderfynu beth sydd er lles gorau eu defnyddwyr. Ond cred y Comisiwn y dylai pob elusen ystyried o ddifrif ac mewn ffordd greadigol a oes ffyrdd y gallent wneud mwy i'w defnyddwyr a chynnig gwasanaeth gwell iddynt trwy weithio gyda'i gilydd. Mae enghreifftiau o arfer dda yn y maes hwn yn amrywio o rannu llinellau cymorth, rhannu cyflwyno gwasanaeth, gweinyddu grantiau cyfunedig a mentrau marchnata neu bwrkasu ar y cyd, i gyfuniadau rhannol neu lawn.

Mae cychwyn unrhyw berthynas yn creu rhywfaint o risg, ac mae angen cynllunio'n briodol a chynnal asesiad manwl o'r manteision tebygol. Mae'r adroddiad yn ystyried y cyfleoedd a'r sialensiau sy'n gysylltiedig â chydweithio a chyfuniadau ac mae'n gwneud argymhellion sy'n cynnig modd i bartneriaethau a gynlluniwyd yn dda ffynnu.

Canfyddiadau

Mae mwy nag un rhan o bump (22%) o'r holl elusennau yn cydweithio ar hyn o bryd yn ôl ein harolwg, ac mae 5% o elusennau yn bodoli o ganlyniad i gyfuniad a ddigwyddodd yn y deng mlynedd diwethaf. Mae 13% o elusennau mawr naill ai wedi cyfuno neu wedi ystyried cyfuno yn ystod y

¹ Yn ôl Arolwg o Agweddau'r Cyhoedd tuag at y Comisiwn Elusennau (1999) teimlai'r mwyafrif o'r rheiny a gwestiynwyd fod gormod o elusennau.

10 mlynedd diwethaf². Dengys ein profiad o waith achosion a chanlyniadau'r arolwg y gall cydwethio gynnig ystod eang o fanteision i elusennau a'u buddiolwyr neu eu defnyddwyr. Rhannu gwybodaeth (59%), cyflwyno gwasanaeth ar y cyd (49%) a rhannu adnoddau i gynyddu effeithlonrwydd (40%) yw'r rhesymau mwyaf cyffredin a nodir dros gydweithio³. Mae elusennau sy'n cydwethio yn frwd dros drefniadau o'r fath, ac yn fwy tebygol o gymryd rhan mewn sawl trefniant cydwethio. Maen nhw hefyd yn fwy tebygol o fod yn elusennau mwy o faint ac wedi'u cyllido gan grant neu contract. I'r gwrthwyneb, nid oes gan 78% o elusennau, yn enwedig elusennau llai o faint, unrhyw drefniadau cydwethio ag elusennau eraill.

Mae gwaith ymchwil blaenorol wedi dangos bod mesur neu ddangos manteision cydwethio a chyfuniadau yn faes dyrys, gan fod nifer o ffactorau a all effeithio ar y canlyniad⁴. Fodd bynnag, mae tua un rhan o dair o elusennau yn gweld gwelliant o ganlyniad i gydweithio, a'r prif faes budd yw gwella dulliau cyflwyno gwasanaeth. Mae trefniadau cydwethio hefyd yn dangos graddfa uchel o amrywiaeth, gydag elusennau sy'n gweithio mewn meysydd gwahanol iawn yn rhannu eu sgiliau a'u profiad er lles y naill a'r llall. Dim ond cyfran fach o elusennau oedd yn teimlo bod eu sefyllfa wedi gwaethygu o ganlyniad i gydweithio.

Mae ein profiad o waith achosion a'r arolwg yn dangos mai eglurdeb disgwyliadau a chyfathrebu agored yw'r ffactorau allweddol ar gyfer cydwethio a chyfuniadau llwyddiannus. Mae trefniadau rheolaeth dryloyw yn arbennig o bwysig i elusennau sy'n gweithio o fewn strwythurau grŵp neu strwythurau cenedlaethol gydag aelodau.

Y cymhellion mwyaf cyffredin ar gyfer elusennau sy'n ceisio cyfuniad oedd: cynyddu effeithlonrwydd (54%); fel ffordd o achub elusen sydd mewn trafferthion (44%); ac atal dyblygu neu wella gwasanaethau (42%). Unwaith eto cyflwyno gwasanaeth oedd y prif faes budd mewn cyfuniad, gyda 44% o elusennau yn gweld gwelliant. Er ei fod yn ymddangos bod cyfuniadau, at ei gilydd, wedi cael effaith niwtral i fwy nag un ym mhob tair elusen, prin iawn yw'r elusennau sy'n teimlo eu bod yn waeth eu byd o ganlyniad i gyfuniad.

Prin yw'r rhwystrau cyfreithiol i gydweithio neu geisio cyfuniad ac mae costau ymchwilio i drefniadau o'r fath neu gymryd rhan ynddynt yn cael ei ystyried yn ddefnydd derbynol o arian elusennol. Fel y noda adolygiad Swyddfa'r Cabinet Gweithredu Preifat, Budd Cyhoeddus, mae'r Comisiwn Elusennau yn chwarae rôl allweddol a defnyddiol i ymddiriedolwyr a'u helusennau i hwyluso cydwethio a chyfuniadau pan fydd y trefniadau hyn er lles yr elusen neu ei defnyddwyr⁵. Gall ymgynghori â'r Comisiwn Elusennau yn gynnar yn y broses helpu sicrhau bod elusennau'n delio â'r materion cyfreithiol a rheoleiddiol yn ddidrafferth ac yn effeithlon, a helpu sicrhau partneriaeth llwyddiannus. Mae'r prif adroddiad yn cynnwys enghreifftiau gwaith achosion o'n rôl.

Profiad gwaith achosion y Comisiwn Elusennau

Y prif faterion y mae'r Comisiwn Elusennau yn dod ar eu traws mewn perthynas â chydweithio a chyfuniadau yw:

- Pan fydd ymddiriedolwyr yn ceisio arweiniad ar y posibilrwydd o gydweithio neu gyfuno fel ffordd o:

- wella eu heffeithlonrwydd a'u heffeithiolrwydd yn y gwasanaethau a ddarparant i'w buddiolwyr neu eu defnyddwyr;
- datrys anawsterau ariannol; a
- lleihau costau codi arian neu weinyddol.
- Pan yr hoffai ymddiriedolwyr gydweithio neu gyfuno ond ni wyddant pa elusen neu elusennau i gysylltu â hwy.
- Pan fydd ymddiriedolwyr yn ceisio cyngor y Comisiwn ar y broses i'w dilyn, yn arbennig pan fydd trefniadau rheolaeth neu gyfansoddiadol yn bodoli, neu i'r gwrthwyneb
 - nid ydynt yn ymgynghori â'r Comisiwn Elusennau a rheolyddion perthnasol eraill mewn da bryd i bennu a oes modd defnyddio eu hasedau mewn trefniant cydwethio, neu a oes angen awdurdod i gyfuno.
- Pan na fydd ymddiriedolwyr yn pennu lefel briodol o gytundeb cytundebol i reoli'r trefniant, neu'n sicrhau bod eu hasedau elusennol yn cael eu defnyddio ar gyfer y diben priodol.
- Pan na fydd ymddiriedolwyr yn sefydlu gweledigaeth gyffredin ar gyfer yr elusen gyfunedig ac, o ganlyniad, mae gwahaniaeth o ran diwylliant neu genhadaeth yn chwalo'r cyfuniad.
- Pan fydd ymddiriedolwyr yn gofyn am arweiniad ar y ffactorau y dylid eu hystyried, gan gynnwys gwaith ymchwil ac archwiliadau cefndir priodol (ymarferion diwydrwydd dyladwy) i bennu natur a statws yr elusen neu'r elusennau y maent yn cyfuno â hwy.

Argymhellion

Mae'r argymhellion sy'n deillio o'n data, profiad o waith achosion ac arolwg o elusennau wedi'u crynhoi isod.

Dylai'r Swyddfa Gartref (Uned Cymunedau Gweithgar):

- hybu mewn unrhyw ddeddfwriaeth elusennau sydd ar ddod becyn o fesurau cyfreithiol a fydd yn hwyluso cyfuniadau ymysg elusennau.

Dylai gweithwyr proffesiynol a chyrrff mantell y sector:

- Ystyried a oes meysydd o weithgaredd elusennol y gellid eu rheoli'n fwy effeithlon. Dylent hefyd ystyried a oes meysydd o or-ddarpariaeth, neu ddyblygu adnoddau nad ydynt er lles buddiolwyr neu ddefnyddwyr. Dylai'r cyrrff ddatblygu atebion posib i gynorthwyo'r elusennau hynny, er enghraifft, creu uned arbenigol sy'n mesur ac yn ystyried ffyrdd o hybu'r manteision a lleihau'r risgiau sy'n gysylltiedig â chydweithio a chyfuniadau⁶; a
- datblygu amrywiaeth o fodolau diwydrwydd dyladwy ar gyfer cyfuniadau o bob lliw a llun.

Fel mater o arfer dda, dylai ymddiriedolwyr:

- bod yn effro i'r manteision posib y gallai trefniadau cydwethio a chyfuniadau eu cynnig i'w helusen a'u defnyddwyr neu eu buddiolwyr. Dylent cynnal adolygiadau rheolaidd i ystyried eu sefyllfa strategol a threfniadau partneriaeth posib.
- bod yn ymwybodol o'r ffactorau sy'n allweddol i gydweithio llwyddiannus, sy'n cynnwys:
 - trefniadau sy'n parchu annibyniaeth pob parti;
 - gweithgareddau a strwythurau trefniadaethol cytûn;
 - diffiniad clir o'r hyn y mae pob parti yn gyfrifol ac yn atebol amdano ac i ba raddau y gall unrhyw barti wneud ymrwymyadau cyfrwymol;
 - cytundebau sy'n cyfateb â risgiau perthynol a chymhlethdod cydwethio; a
 - chymal terfynu mewn contractau ffurfiol;
- ystyried ymgynghori neu gydweithio ag elusennau sy'n arbenigo mewn materion amrywiaeth a chydraddoldeb fel ffordd o hybu mynediad cyfartal i wasanaethau.
- bod yn ymwybodol o'r ffactorau sy'n allweddol i gyfuniadau llwyddiannus, sy'n cynnwys:

² Diffinnir elusennau mawr fel y rheiny sydd ag incwm o rhwng £250,000 a £999,999 y flwyddyn.

³ Gallai fod mwy nag un cymhelliad y tu ôl i fenter gydweithredol, felly mae'r cyfansymiau a ddyfynnir yn nodi mwy na 100%.

⁴ Er enghraifft, gweler *Group Dynamics: Group Structures and Registered Social Landlords*, Llundain gan y Comisiwn Archwilio/Corfforaeth Tai (2001).

⁵ Swyddfa'r Cabinet, Uned Strategaeth, (2002) *Gweithredu Preifat, Budd Cyhoeddus*.